

## Objektivat e besimit islamik (akides)

Shejh Salih ibn Uthejmin, "Shpjegim i Themeleve të besimit islamik"

Fjala arabe *hedef* (objektiv) ka disa kuptime: një objekt që merret nishan dhe gjuhet me armë; një objekt që dëshirohet. Objektivat e akides islamike mund të përkufizohen si qëllime fisnike që synon individi duke besuar në to dhe duke iu përmbytur atyre. Ka shumë objektiva të akides islame dhe prej tyre po veçojmë:

- **Sinqeriteti dhe dëlirësia e nijetit.**

Allahu ﷻ është Krijuesi i pashoq, kështu që nijeti dhe adhurimi duhet t'i kushtohen vetëm Atij.

- **Çlirimi i mendjes dhe i intelektit nga idetë e rreme, nga marrëzitë dhe nga absurditeti.**

Kushdo që nuk ka këtë besim të vërtetë apo këtë akide, do të dëmtohet intelektualisht dhe shpirtërisht, do të bëhet një adhurues i gjërave materiale e i dëshirave fizike, apo do të ngecë në ndonjë doktrinë a ideologji çorientuese e të pamend.

- **Paqja e zembrës dhe e mendjes.**

Besimi tret dëshpërimin, dobësinë e zembrës dhe shqetësimin. Sepse, nëpërmjet besimit, njeriu lidhet me Zotin e vet, Krijuesin, Mbajtësin. Kësisoj njeriu pranon Zotin dhe Furnizuesin e vet për Ligjvënës, Sundues dhe Gjykatës dhe bëhet i kënaqur me caktimin (*kaderin*) e urtë të Tij. Zemra e tij hapet e zgjerohet për fenë Islame dhe ai nuk dëshiron zëvendësimin e saj.

- **Vetëdija e pastër, dëlirësia e sinqeriteti në nijet dhe në të vepruar në adhurimin ndaj Allahut ﷻ, Zotit të vetëm të vërtetë, dhe po ashtu në bashkëveprimet me njerëzit.**

Parimi themelor në Islam është ndjekja e të Dërguarve në dëlirësi dhe sinqeritet, në nijet dhe në të vepruar.

- **Serioziteti dhe vendosmëria në të gjitha çështjet.**

Një besimtar i devotshëm nuk humb rastin për të bërë mirë me shpresë se do të shpërblehet, ndërsa u shmanget joshjeve e punëve të këqija nga frika e ndëshkimit të Tij. Sepse ndër parimet themelore të Islamit është besimi në Ringjallje dhe në Llogaridhënie si për punët e mira, si për të këqijat.

- **Vendosja e një populli (umeti) të fortë apo një komuniteti besimtarësh muslimanë, të cilët nuk kursejnë asgjë për Allahun ﷻ, me qëllim që t'i mbrojnë dhe t'i mbështesin themelet e besimit.**

Ky lloj besimtarësh nuk duan t'ia dinë për problemet e mundshme në rrugën e Allahut ﷻ.

- **Arritja e lumturisë së skajshme në këtë jetë dhe në jetën e pastajme nëpërmjet reformimit dhe kultivimit të punëve të mbara te individët dhe te grupet, me qëllim që të arrihen shpërblimet më fisnike.**